

SA's Leading Past Year

Exam Paper Portal

STUDY

You have Downloaded, yet Another Great Resource to assist you with your Studies 😊

Thank You for Supporting SA Exam Papers

Your Leading Past Year Exam Paper Resource Portal

Visit us @ [www.saexampapers.co.za](http://www.saexampapers.co.za)



SA EXAM  
PAPERS



# basic education

Department:  
Basic Education  
**REPUBLIC OF SOUTH AFRICA**

## **NATIONAL SENIOR CERTIFICATE**

**LIBANGA 12**

**SISWATI LULWIMI LWASEKHAYA (HL)**

**LIPHEPHA LESIBILI (P2)**

**LWETI 2018**

**TICONDZISO TEKUMAKA**

**EMAMAKI: 80**

**Leticondziso tekumaka tinemakhasi la-25.**

**TICONDZISO TEKUMAKA**

1. Nangabe umhlolwa aphenzvule imibuto lengetulu kwaleyo lelindzelekile, maka timphendvulo letisekucaleni kuphela. **(Umhlolwa akumelanga aphenzvule indzabambhalo kanye nemibuto lemifisha encwadzini yinye.)**
2. ESIGABENI A, nangabe umhlolwa aphenzvule ngato tonkhe totine tinkondlo (Tinkondlo letifundvwe eklasini), maka letimbili tekucala kuphela.
3. ESIGABENI B ne-C (Lulwimi Lwasekhaya), nangabe umhlolwa aphenzvule imibuto lemibili kulemifisha nobe imibuto lemibili yetindzabambhalo, maka imphendvulo yekucala kuphela uyekele lelandzelako. Nangabe umhlolwa aphenzvule yomine imibuto, maka kuphela imphendvulo yembuto wekucala kuleso naleso SIGABA, ngaphandle kwekutsi uphendvule munye umbuto lonemibuto lemifisha namunye umbuto wenzabambhalo.
4. Nangabe umhlolwa anike timphendvulo letimbili lapho imphendvulo yekucala iliphutsa kantsi lena yesibili iliciniso, akumakwe imphendvulo yekucala yesibili ingamakwa.
5. Nangabe tinombolo tetimphendvulo tinemaphutsa, maka ulandzele imemorandamu.
6. Nangabe liphutsa lesipelingi litsikameta inshokutsi, akunganikwa limaki, kantsi nangabe inshokutsi ayitsikameteki, akunikwe limaki.
7. Umbuto wenzabambhalo: Nangabe indzabambhalo inemagama langaphasi kwalawo lemisiwe, umhlolwa akangajeziswa ngobe vele sewutijezise yena ngekwakhe. Nangabe indzabambhalo iyindze kakhulu, akahlolwe ngekwelikhono lakhe bese kucociswana nalabaphetse umsebenzi wekumaka. **Akusetjentiswe irubhriki yekumaka indzabambhalo lesesichibiyelweni A ne-B.**
8. Imibuto lemifisha: Nangabe umhlolwa angakafaki bokhulumile nangabe kufanele acaphune **akangajeziswa.**
9. **Emibutweni levulekile** bahlolwa abanganikwa emamaki nangabe baphendvule ngetimphendvulo letitsi: YEBO/CHA nobe NGIYAVUMA/ANGIVUMI. Onkhe emamaki anikwa sizatfu/kuchaza ngalokugcwele/kwesekela/kucaphuna.
10. Emibutweni lefuna LICINISO/LIPHUTSA nobe LIPHUZU/UMBONO emamaki akangehlukani emkhatsini, lokusho kutsi alikho limaki lelinikwa LICINISO/LIPHUTSA nobe LIPHUZU/UMBONO, onkhe emamaki anikwa sizatfu/kuchaza ngalokugcwele/kwesekela/kucaphuna.

**SIGABA A: TINKONDLO****TINKONDLO LETIFUNDVWE EKLASINI****UMBUTO 1: UMBUTO LOYINDZATJANAMBHALO****'LOMFUNDVO' – GT Nkosi****INDZATJANAMBHALO**

Sakhiwo sendzatjanambhalo kumele sivete *singeniso, umtimba nesiphetho*.

*Imifanekisomcondvo lesetjentiswe ngusonkondlo kuveta indlela labona ngayo tintfo.*

**SINGENISO:**

Bahlolwa bachaza sihloko. Babuye bachaze kutsi sonkondlo ubona tintfo ngendlela yakhe bese usebentisa imifanekisomcondvo, kute tetsamelilwati tivisise kahle loko lokwetfulwako.

**UMTIMBA:**

Kuchazwa kabanti ngelikhono lasonkondlo ekusebentiseni imifanekisomcondvo, kuveta indlela labona ngayo tintfo, lefaka ekhatsi lena lelandzelako:

- **Makoti** – Sonkondlo ubona imfundvo ifana namakoti engcondvweni yakhe. Imfundvo yenta imisebenti leminyenti, sib. Intjintja ingcondvo yemuntfu ikhaliphe njengamakoti lontjintja umuti lendze kuwo ubukeke kabusha.
- **Celemba** – Sonkondlo ubona imfundvo ifana nacelemba ngekukhalipha ekuloleni ingcondvo yemuntfu ikhaliphe.
- **Kulola** – Bantfu nabafundziswa, sonkondlo ubona shangatsi bayalolwa ngobe ingcondvo yabo itawukhalipha.
- **Kufuna** – Nakuyiwa esikolweni, sonkondlo ukufanisa nekuyewufuna imfundvo, engcondvweni yakhe.
- **Tandla letikhaliphako** – Sonkondlo ufanisa loko lokufundvwako netandla lekungito letilola labafundzako.
- **Kuhlaba inhlupheko** – Sonkondlo ufanisa kuhlaba inhlupheko ibaleke nekucedza kungati ngemfundvo.
- **Libhuloho** – Sonkondlo ufanisa imfundvo nelibhuloho lekwewelwa ngalo nakuyiwa ekukhanyeni kwekuba nelwati.
- **Sikhiya** – Sonkondlo ufanisa sikhiya nemfundvo ngobe ivula ingcondvo ivulekele kutfo lwati.
- **(Kucija/ Chawekati/ Kukhalipha/ Umkhonto/ Sitsandwa, njll.)**  
(Naleminye imibono lenembako yemukelekile.)

**SIPHETFO:**

Bahlolwa basonga konkhe labebakhuluma ngako lapha ngenhla, lapho baphawula khona ngekufaneleka kwemifanekisomcondvo lesetjentiswe ngusonkondlo, kuveta indlela labona ngayo tintfo kulenkondlo.

**CAPHELA:** Bahlolwa kumele bacaphune imifanekisomcondvo lesenkondlweni kwesekela imibono yabo.

**BONA EMARUBHRIKI EKUMAKWA KWENDZATJANAMBHALO YETINKONDLO, SIGABA A.****[10]**

**UMBUTO 2: IMIBUTO LEMIFISHA****'UYILIMILE INDZIMA' – FC Nkosi**

- 2.1 Chawe lemachawe/Uyilimile indzima yakho. (1)
- 2.2 Yefika inala, yahamba indlala/ **Umusho loseemgceci 15.** (1)
- 2.3 **Waphuma**  
**Walima** (1)
- 2.4 Sonkondlo usho kutsi Madiba walwa wate wayitfolo inkhululeko/ **Nanobe Madiba asaphuma ejele, wachubeka nekulwela inkhululeko sive sema-Afrika sate sakhululeka.** (1)
- 2.5 Kuna kwemvula kusho kwesutsa nekuphila kamnandzi unetseteke ngobe imvula iluphawu lwenala lolukhomba kwesutsa/Nasekuphele lubandlululo, bantfu batawuphila kamnandzi njenganakune imvula/ **Usho kufika kwenkhululeko leyaletsa kuphila kamnandzi.** (Naleminye imibono lenembako yemukelekile.) (2)
- 2.6 Imibono itawehluka ifake ekhatsi loku lokulandzelako:  
Labatsi ucinisile batawutsi: Nangabe Madiba sancobe lubandlululo, inkhululeko seyikhona, bantfu batawutfufuka bambonge ngalabentele kona/ **Nangabe lusha lungenta njengaMandela, sive singaba nebantfu labacotfo nalabahlakaniphile, sitfutfuke bese kubongwa yena Mandela ngekuba sibonelo lesihle/ Ucinisile ngoba tive titawuhlangana tihlale ndzawonye emva kwalenkhululeko lewayilwela timbonge.** (Naleminye imibono lenembako yemukelekile.)  
Labatsi akusilo liciniso, batawesekela labakushoko, kuhambisane nenkondlo. (2)
- 2.7 Lusha lwalomuhla. Luyalwa ngebunandzi lolucala ngabo nekubhenywa kwetidzakamiva kutsi lufanele lukuyekele/ **Lusha, lunake imfundvo luyekele tidzakamiva.** (Naleminye imibono lenembako yemukelekile.) (2)

**[10]****UMBUTO 3: IMIBUTO LEMIFISHA****'DZELIWE!' – ME Masina**

- 3.1 Uvukwe lusinga lwelusizi/ lwekushiywa nguDzeliwe/ **Iwekutsandza Dzeliwe/ Iwekwehlukana naDzeliwe/ Iwebuhlungu/ Iwenkhumbulo.** (1)
- 3.2 Ngitjele. (1)
- 3.3 Wentela kugcizelela kutsi lenkondlo ikhuluma ngaDzeliwe/Ufuna kucinisekisa kutsi tetsamelilwati tati kutsi lenkondlo iphatselene naDzeliwe/ **Ufuna kutsi tetsamelilwati tati kutsi uyakhala ngaDzeliwe,** njll. (Naleminye imibono lenembako yemukelekile.) (1)
- 3.4 Usho imphilo yaDzeliwe/ **Indlela labephila ngayo Dzeliwe.** (1)

- 3.5 Kungobe uyasho sonkondlo kutsi uva bakhuluma ngalokwenteke kuDzeliwe, akakatiboneli ngekwakhe. Ufanisa loko lakuvako neliphupho/ **Ngobe abemtsandza angacabangi kutsi angashona.** (2)
- 3.6 Imibono itawehluka:  
Labatsi ulikhetse kahle batawesekela ngekutsi, emanyeve asho tinhlupheko talomhlaba, ngobe nato tibuhlungu njengekuhlatjwa ngemanyeve. (Naleminywe imibono lenembako yemukelekile.)  
Labatsi alikakhetseki kahle, batawesekela labakushoko, kuhambisane nenkondlo. (2)
- 3.7 Sonkondlo utsi Dzeliwe abenetitfo letinhle/ abengenamicondvo/ **Abenebuso lobuhle/ Abenetitfo letigwele.** (2)

**[10]****UMBUTO 4: IMIBUTO LEMIFISHA****'LUTSANDVO' – SC Msibi**

- 4.1 Ngob' ungakavangwa nalutfo loluyimali/ Umugca we-10. (1)
- 4.2 Sicedzelelamcondvo/I-enjambamenti. (1)
- 4.3 Kumuntfutisa – Sonkondlo ubhala ngatsi ukhuluma nalo lolutsandvo/Sifaniso-wafana nencwadzi lefundzekako. (1)
- 4.4 Yinkondlo yemvangedvwa/Yilirikhi. (1)
- 4.5 Sonkondlo usho kutsi lutsandvo lunetimo letehlukahlukene, kulesinye sikhatsi luba lukhulu, lube yintondvo, bantfu benyanyane bate behlukane, njll. (Naleminywe imibono lenembako yemukelekile.) (2)
- 4.6 Kulapho titsandzani setingasevani, lutsandvo lungasahambi kahle, bese sonkondlo ulufanisa nemhlonyane. (Naleminywe imibono lenembako yemukelekile.) (2)
- 4.7 Kubaba njengemhlonyane/ Kufana nesihambi. (2)

**[10]****NA**

**INKONDLO LENGAKAFUNDVWA EKLASINI****UMBUTO 5****'EKUJULENI KWENGCONDVO' – VJ Nkwanyana**

- 5.1 Lehlala ngekukhatimula njalo/ **umugca 9.** (1)
- 5.2 Yimvumelwanosicalo. (1)
- 5.3 Ngatibuta ngatiphendvula/ **Umugca we-6/ Ngabe sengiyajula ngengcondvo/Umugca we-2/ Ngakubukisisa lilanga lonkhe ngijula/ Umugca-12/ Umugca-4.** (1)
- 5.4 Lutsandvo lwaLomalanga/ Abetsandza Lomalanga/ **Imicabango lanayo ngaLomalanga.** (1)
- 5.5 Angaphazanyiswa kufa.  
Kutakushel' eboyeni njengetifukutfuku tenja,  
Kulapho sekafikile Nkuzikayidedi,  
Lotekugwiny' imphilo yami. (2)
- 5.6 Sonkondlo abekhohlelwa kulabaphasi/ **emadlotini/ emasikweni/ elwatini lwenzabuko/ esintfwini** ngobe lapha enkondlweni utsi, 'Ngakhetselwa bokhokho ngiselizini.' (2)
- 5.7 Sonkondlo usho kutsi wesusa konkhe langakutsandzi kuLomalanga wangakunaki/ Akamange akunake loko lebekukubi ngaLomalanga. Ufuna kugcila elutsandvweni lwakhe ngaLomalanga anganaki lokubi/ **Wacabanga lokungasikahlewabuyawawucitsa (wawuyekela) lowomcabango.** (Naleminye imibono lenembako yemukelekile.) (2)

**[10]****SAMBA SESIGABA A: 30**

**SIGABA B: INOVELI/TEMDZABU****UMBUTO 6: UMBUTO LOYINDZABAMBHALO****LIPHUME NEBOVU – BB Malangwane**

Sakhiwo sendzabambhalo kumele sivete *singeniso, umtimba nesiphetfo*.

**'Labasembili baba semuva, labasemuva babe sembili,' kubhekiswa kuTintfombi naLaMagagula.**

**Singeniso**

Bahlolwa bachaza sihloko babuye basho nekutsi tento tebalingisi tiyakuveta kutsi, labasembili baba semuva, labasemuva babe sembili.

**Umtimba**

Tigameko letikhomba kutsi labasembili baba semuva, labasemuva babe sembili.

- Kwenzwa kwaTintfombi kuLushawulo.
  - Tintfombi abetibona asembili nagana Lushawulo, amteka. Loko kwamenta waba sembili kunaLaMagagula njengobe abebuya naseJozi, LaMagagula ahlala emakhaya. Watishaya sifuba kutsi nguye intsandvokati njengobe Lushawulo abekhombisa kutsi utsandza yena kunaLaMagagula, kantsi abemdlisile. Lushawulo abebonakalisa ngekunganaki bantfwana baLaMagagula, wate wehluleka nekuta emngcwabeni wemntfwanakhe.
- Kutsandvwa kwaTintfombi nguLaHlophe.
  - Tintfombi wefika wahamba embili kuninatale, LaHlophe abetsandza bantfwana baTintfombi kunebaLaMagagula, wate wabetsa emabito lamnandzi, baLaMagagula wabetsa emabito lamabi ngobe atsafwa njengemuntfu loseemuva.
- Kuhamba naLaMagagula kubelaphi.
  - Tintfombi abetsi nagulelwa bantfwana kusukume ngisho LaMagagula imbala ngobe avelana naye futsi esaba kutsi Lushawulo utawuphatseka kabi nangamesekeli. Loko kwenta Tintfombi atibone asembili impela kunaLaMagagula, kantsi baLaMagagula bebagula bate bashone angenanzaba Tintfombi ngobe asembili.
- Kunukwa kwaLaHlophe.
  - Tintfombi abesembili kuLushawulo ngobe wametsemba ngalesikhatsi atsi unina uyatsakatsa. Kungenelela kwaLaMagagula ekhute Lushawulo kwamenta wacishe wacoshwa. LaMagagula waba sembili ngobe kwasala yena emtini waLushawulo.
- Kunukwa kwaTintfombi emkhayeni.
  - Tintfombi watenta longati kutsi ucedvwa yini umuti waLushawulo. Kwatsi nakuvela emaciniso ekutsi nguye umtsakatsi, wacoshwa kaKhumalo waba ngulondzindzako wagcina asemuva kunaLaMagagula ngobe yena amange ashaywe emkhayeni, ngaloko waba sembili kunaTintfombi.

(Naleminye imibono lenembako yemukelekile.)

**Siphetfo**

Bahlolwa basonga konkhe lebebacoca ngako lapha ngenhla, ngekuphawula kutsi ngempela Tintfombi waba semuva kantsi abesembili, LaMagagula waba sembili kantsi abebukeka asemuva.

**CAPHELA:** Bahlolwa kumele bacaphune tigameko letisenovelini letesekela imibono yabo.

**BONA EMARUBHRIKI EKUMAKWA KWENDZABAMBHALO, SIGABA B na C**

**[25]**



**UMBUTO 7: IMIBUTO LEMIFISHA****LIPHUME NEBOVU – BB Malangwane**

- 7.1 Kucamba emanga kwaTintfombi atsi uninatala uyatsakatsa. Kube nemtselela wekutsi Lushawulo acoshe LaHlophe. (2)
- 7.2 Basala bageza ngalesikhatsi bonina baye emasimini, loko kukhomba kutitsandza njengobe bekungekho lobasele ngemuva kutsi bageze. (2)
- 7.3 Abemtjela kutsi akamemukeli lapha emtini wabo. Abekholwa kutsi LaHlophe vele uyatsakatsa. (2)
- 7.4 Ititjela kutsi akasamfuni LaHlophe kulomuti waLushawulo. Umbhali umetfule ngenkhulumo yakhe. (2)
- 7.5 Sibe nemtselela wekutsi Lushawulo atfole umsebenti/ Tintfombi wefika wamehlisa sifunti ngekutiphatsa kabi ate atale liphumalimile/ Senta kutsi angasheshi atfolakale kutsi wayaphi. (2)
- 7.6 Abetawutsi nasalambile adle tincozi/ Abetawutfola umtfunti lomnandzi wekuphumula/ Abengeke abandzakanyeke etinkhulumeni tekuletfwa kwaLahlophe. (2)
- 7.7 Bekutawuba neludvweshu. Lushawulo abetawulwa naLaMagagula kutsi umemukeleleni unina/ Lushawulo abetawulwa nenina ngobe abemtsatsa njengemtsakatsi/ Tintfombi abengeke aphantseke kahle ngobe abengamfuni uninatala. (2)
- 7.8 Bebakhombisa buntfu/Bebakhombisa sihawu/Bebakhombisa kutsi sihambi nasifike emtini sinikwa kudla. (2)
- 7.9 Kuyiswa ekhaya lalabadzala/Kufunelwa indzawo yekuhlala/Kucashelwa umuntfu latamsita/Kumcelela lusito kuhulumende/ **Kumakhela lakhe likhaya latawuhlala kulo**, njll. (Naleminye imibono lenembako yemukelekile.) (2)
- 7.10 LaMagagula abati kahle kutsi Lushawulo akamemukeli unina ngobe atsi uyatsakatsa. Abentiwa kwesaba kutsi naye angahle acoshwe njengobe Lushawulo asho nacosha unina/ **Njengamake welikhaya, LaMagagula abekholelwa kutsi angeke atsatse sincumo ngobe loko kungumsebenti waLushawulo njengababe welikhaya.** (2)
- 7.11 BoLaMagagula naTintfombi bebangevani/bebangatsandzani ngekutsi Tintfombi abeloyisa LaMagagula, naye LaMagagula watitfola asesitsenjini ngenca yaTintfombi/Lokuhamba kanye kanye bebentela kutsi ummango nebantfwana babone ngatsi bayevana/bayatsandzana. (Naleminye imibono lenembako yemukelekile.) (2)
- 7.12 Abentela kutsi kungabonakali kutsi nguye longumtsakatsi/Abefihla kutsi kungabonakali kutsi Lushawulo weva ngaye ngebutsakatsi LaHlophe/. Lushawulo abengeke evisise nasabona Tintfombi emukela LaHlophe/ Abehambisana nemibono yakhe ngobe abemtsandza njengendvodza yakhe, njll. (Naleminye imibono lenembako yemukelekile.) (3)

**[25]**

**UMBUTO 8: UMBUTO LOYINDZABAMBHALO****KUBAMBA LETINGELAKO – DE Nkosi**

Sakhiwo sendzabambhalo kumele sivete *singeniso, umtimba nesiphetho*.

**'Labasembili baba semuva, labasemuva babe sembili,' kubhekiswa kuMagumeni naMphikeleli.**

**Singeniso**

Bahlolwa bachaza sihloko babuye basho nekutsi tento tebalingisi tiyakuveta kutsi, labasembili baba semuva, labasemuva babe sembili.

**Umtimba**

Tigameko letikhomba kutsi labasembili baba semuva, labasemuva babe sembili.

- Kutibeka embili kwaMagumeni ngobe atibona afundzile.
  - Magumeni abetibona asembili ngobe afundze waba nguthishela, atsatsa Mphikeleli njengemuntfu loseemuva longakafundzi. Emva kwaloko Mphikeleli wafundza waba neticu tekuphatsa ummango, waba sembili, Magumeni ngaloko waba semuva.
- Kuphikisana kwaMagumeni naMphikeleli emihlanganweni yemmango
  - Magumeni abetati anelwati lolunyenti lwekubamba imihlangano ngobe anguthishela, lokwamenta abe sembili kunaMphikeleli. Abesukuma emihlanganweni aphikise lokushiwo nguMphikeleli, ngaphandle kwekunikwa litfuba lekukhuluma ngobe atsatsela Mphikeleli phasi, ambona asemuva kunaye kantsi emalunga emhlangano atawuma naMphikeleli, abe sembili, Magumeni abe semuva.
- Magumeni uba sesikhundleni sebukhansela.
  - Magumeni waba sembili ngekuba likhansela lemmango, abetiphakamisa ngekunaka bantfu labanjingile, Mphikeleli anaka wonkhe umuntfu, lokwenta abukeke ngatsi usemuva, kantsi bantfu bebefuna lonaka wonkhe umuntfu, lokwente Mphikeleli waba sembili, Magumeni waba semuva.
- Lukhetfo lwaboSosifundzave.
  - Emkhankhasweni wabososifundzave, umkhankaso waMagumeni abewubhekise kulabanjingile ngobe naye abetibona asembili, Mphikeleli abewubhekise kubo bonkhe, labaphuyile nalabanjingile, lokwenta kutsi akhetfwe. Magumeni akamange aphumelele, waba semuva, Mphikeleli waba sembili ngobe waluncoba lukhetfo.
- Kukhuluma kabi ngaMphikeleli emmangweni entela kutsi umvukele.
  - Magumeni watibona asembili, ngekukhuluma emanga atsi Mphikeleli akasuye wekutsalwa Embalenhle ngobe afuna ummango umvukele, kantsi Mphikeleli labebonakala asemuva, abewekutsalwa Embalenhle, lokwenta ummango umesekele, abe sembili, Magumeni abe semuva.

(Naleminye imibono lenembako yemukelekile.)

**Siphetho**

Bahlolwa basonga konkhe labebacoca ngako lapha ngenhla, ngekuphawula kutsi ngempela Magumeni waba semuva kantsi abesembili, Mphikeleli waba sembili kantsi abebukeka asemuva

**CAPHELA:** Bahlolwa kumele bacaphune tigameko letisenovelini letesekela imibono yabo.

**BONA EMARUBHRIKI EKUMAKWA KWENDZABAMBHALO, SIGABA B na C**

**[25]**

**UMBUTO 9: IMIBUTO LEMIFISHA****KUBAMBA LETINGELAKO – DE Nkosi**

- 9.1 Likhono lakhe walibonakalisa eKhayaletfu wakhetfwa waba ngumholi webafundzi/enyuvesi nakhona wakhetfwa waba ngumholi/emmangweni khona, wakhetfwa waba likhansela wabuye waba ngusosifundzave, njll. (Naleminye imibono lenembako yemukelekile.) (2)
- 9.2 Dokotela Gamedze ulilunga lemmango, uyati ngaloko lokwenteka enyuvesi, wati kutsi umholi webafundzi nguMphikeleli, nekutsi uchuba njani emsebentini wakhe. Umtselela wekutsi batali bayati kutsi bantfwana babo bachuba njani esikolweni. (2)
- 9.3 Letheksthi lengenhla ikhuluma ngaDokotela Gamedze naDlamini. Lokusho kutsi bakholelwa enkolweni yaseNshonalanga neyeTemdzabu. (2)
- 9.4 Kwelashwa kwaMatsiya kubufakazi ngobe welashwa nguDokotela Gamedze naDlamini, Gamedze usebentisa kwelapha kwaseNshonalanga kantsi Dlamini usebentisa kwelapha kweTemdzabu (2)
- 9.5 Sifo sengculaza/Sifo sesifuba/Sifo sashukela. (Naleminye imibono lenembako yemukelekile.) (2)
- 9.6 Akagucugucuki/Tintfo takhe tonkhe tiyamlungela, kute lapho ehluleka khona/Labaneminyaka le-21, abemukelwa esikolweni kepha yena wemukelwa/Ungumlingisi longakholweki, njll. (Naleminye imibono lenembako yemukelekile.) (2)
- 9.7 Kutsambisa lowo lokumele akusite/Kubona bunjalo balowo lokumele akusite/Kutfole tindzaba telive kutsi lime njani, njll. (Naleminye imibono lenembako yemukelekile.) (2)
- 9.8 Bebenta timphamba/Bebaphahla/Bebagcina timfuneko talabaphasi/Bebagezala kucosha emashwa, njll. (Naleminye imibono lenembako yemukelekile.) (2)
- 9.9 Imibono itawehluka ifake ekhatsi loku lokulandzelako: Kuseshwa kwaMphikeleli ngemaphoyisa angatfoli lufu, kuyabonakala kutsi abeve ngemahemuhemu/Kutsi Mphikeleli abeliphekulatikhuni, bekungesilo liciniso, bekungemahemuhemu/Kutsi Mphikeleli abengasuye umsinsi wekutimilela eMbalenhle, bekungemahemuhemu, njll. (Naleminye imibono lenembako yemukelekile.) (2)
- 9.10 Imibono itawehluka ifake ekhatsi loku lokulandzelako: Kuphambana ngemibono ngenchubo yasesikolweni/Kutakhela imitsetfo ngaphandle kwekubonisana nebafundzi/Kungemukeli bafundzisi betifundvo letitsite, njll. (Naleminye imibono lenembako yemukelekile.) (2)

- 9.11 Imibono itawehluka ifake ekhatsi loku lokulandzelako:  
Labatsi abedvumile batawesekela ngekutsi, lapho Abelaphela khona bekugcwele, dokotela watsi ababuye ngakusasa/Kwelapha kwakhe Matsiya babe labanye behlulekile kumelapha nako bekumenta advume/ BeTendzabuko labanjengaDlamini, wafola indzawo yekwelaphela khona ngobe abedvumule, njll.  
(Naleminye imibono lenembako yemukelekile.)  
Labatsi abengakadvumi batawesekela imibono yabo. (2)
- 9.12 Imibono itawehluka ifake ekhatsi lelandzelako:  
Sigameko sekutsetfwa kwelicala laMphikeleli esikolweni, Sikhulu Tsabetse atsi akacoshwe/Sigameko sekuphikisana kwaMagumeni naMphikeleli emhlanganweni, afuna kuphendvulwa ngenkhani/Kuphikisana kwaKhulumile naLotifiso, khulumile atsi kutawuphumelela Mphikeleli, Lotifiso atsi kutawuphumelela Magumeni/Kuphikisana kwaMatsiya naSikhulu Tsabetse ngalesikhatsi Matsiya ayewumela Mphikeleli esikolweni, njll.  
(Naleminye imibono lenembako yemukelekile.) (3)

**[25]**

**UMBUTO 10: UMBUTO LOYINDZABAMHALO****TIBOPHO TELUTSANDVO – JJ Thwala**

Sakhiwo sendzabambhalo kumele sivete *singeniso, umtimba nesiphetfo*.

**'Labasembili baba semuva, labasemuva babe sembili,' kubhekiswa kuLomusa naSitsembile.**

**SINGENISO**

Bahlolwa bachaza sihloko babuye basho nekutsi tento tebalingisi tiyakuveta kutsi, labasembili baba semuva, labasemuva babe sembili.

**UMTIMBA**

Tigameko letikhomba kutsi labasembili baba semuva, labasemuva babe sembili.

- Lomusa ugana Mlungisi.
  - Lomusa abehamba embili ngekutsandvwa nguMlungisi, Sitsembile yena eta ngasemuva ngekwelutsandvo, kantsi utawuba semuva nasaboshwa aya ejele, Sitsembile abe sembili.
- Lomusa abenemali lenyenti.
  - Lomusa abenemali lenyenti kantsi yebugebengu netidzakamiva, lobekumenta acatjangelwe kutsi ungumuntfu losembili kunaSitsembile. Kutsite nakuvela kutsi lemali yebugebengu netidzakamiva, Lomusa wahlazeka, waba semuva kunaSitsembile. Sitsembile waba sembili ngekungabi nalihlazo.
- Lomusa ulandza Mlungisi embi kwaSitsembile.
  - Lomusa abetibeka embili kunaSitsembile, acabanga kutsi Mlungisi utawuteka yena, kantsi umshado utawucitfwa kuboshwa kwakhe lokwambeka emuva, Sitsembile abesembili ngobe abesasele naMlungisi.
- Lomusa ulotjolwa nguMlungisi.
  - Lomusa wahamba embili ngalesikhatsi Mlungisi amlobola, Sitsembile angasanakwa asemuva. Lomusa waba semuva ngobe kulotjolwa kwakhe akumange kube namphumelelo. Sitsembile waba sembili ngobe abephila ngaphandle Lomusa abhadla ejele.
- Lomusa ucamba emanga ngetemsebenti.
  - Lomusa abecamba emanga atsi yena usebenta kahle enkanpanini letsite, entela kutsi kutsiwe usembili kunaSitsembile, kantsi abecamba emanga angasebenti ndzawo. Waboshwa waba semuva, Sitsembile waba sembili.
- **Kuba nemngani welibala lelehlukile.**
  - **Lomusa watibona asembili ngekuba nemngani wemlumbi labehlala amtfwala ngetimoti letisembili kantsi Sitsembile yena abehamba ngetinyawo, lebekumenta abe semuva. Ekugcineni Lomusa waba semuva ngekuboshelwa yona lemoto labayisebentisela kutfumba, Sitsembile waba sembili.**

(Naleminye imibono lenembako yemukelekile.)

**SIPHETFO**

Bahlolwa basonga konkhe labebacoca ngako lapha ngenhla, ngekuphawula kutsi ngempela Lomusa waba semuva kantsi bekasembili, Sitsembile waba sembili kantsi abebukeka asemuva.

**CAPHELA:** Bahlolwa kumele bacaphune tigameko letisenovelini letesekela imibono yabo.

**BONA EMARUBHRIKI EKUMAKWA KWENDZABAMBHALO, SICHIBIYELO B na C [25]**

**UMBUTO 11: IMIBUTO LEMIFISHA**

**TIBOPHO TELUTSANDVO – JJ Thwala**

- 11.1 Abengabatiswa kutsi Sitsembile utetfwele. Loku bekwenta angati kutsi nangabe angamteki, akhetsa Lomusa, utambelekela yini bantfwana. (2)
- 11.2 Abengabika indzaba yekutsi Mlungisi umkhulelisile/Angatsi naye abecabanga kutsi utamteka/Abengatsi umcitsele sikhatsi kantsi ngabe wendza embili/ Abatiwa kaboMlungisi. (2)
- 11.3 Kubhanca tingani, boSitsembile naLomusa/Ukhohlisa bangani bakhe utsi uyagula kantsi ucabanga ngaloLomusa/Ukhohlisa bangani bakhe utsi Lomusa ngumngani wenina kantsi singani sakhe/ **Ukhohlisa Sitsembile utsi ubuya kuyewuvakashela umngani wakhe kantsi ubuya kuLomusa.** (2)
- 11.4 Imibono itawehluka: Labatsi abewabuta ngeliciniso batawesekela ngekutsi: Abekhombisa kutsi uyamkhatsalela Sitsembile/Abekhombisa kumhlonipha/ Abefuna kubona kutsi ngabe kumphatsa njani Sitsembile loko lakwentako naLomusa Abemphukuta. (Naleminywe imibono lenembako yemukelekile.) Labatsi abengawabuti ngeliciniso batawesekela labakushoko. (2)
- 11.5 Betingalwa tilimatane/Betingatsengelana tigebengu/Betingamala lomfana letimlwelako/ **Betingafuna Mlungisi akhetse kubo bobabili kutsi utsandza bani/ Betingamlahla totimbili/ Betingamhlanganyela timshaye,** njll. (Naleminywe imibono lenembako yemukelekile.) (2)
- 11.6 Abecabanga kutsi Lomusa utawulwisa Sitsembile/ Abeyawutsatsa lekumele ahambe nako, njengetembatfo tekulala/ Abefuna kuvikela Sitsembile. (2)
- 11.7 Enhlityweni yakhe abefisa kutsi Mlungisi ateke Sitsembile, ayekele Lomusa. Sitsembile utetfwele umtukulu wakhe/ Lomusa ungumfelokati. (Naleminywe imibono lenembako yemukelekile.) (2)
- 11.8 Imibono itawehluka ifake ekhatsi loku lokulandzelako: Kuphuma ngiye ekhaya/ **Kushaya Lomusa/ Kwalela Mlungisi kutsi ahambe/ Kwehlukana naMlungisi,** njll. (Naleminywe imibono lenembako yemukelekile.) (2)
- 11.9 Akamange ente kahle ngobe Sitsembile washo kalusizi namvumela kutsi ahambe lokubonakala kahle kutsi abeva buhlungu, abengafuni kutsi Mlungisi ahambe/Akukalungi kufika utsatse lijaha entfombini. (Naleminywe imibono lenembako yemukelekile.) (2)

- 11.10 Abenenhloso yekuvisa Sitsembile buhlungu/Abefuna kubonakale kutsi uyintfombi yaMlungisi/Abefuna kubona kutsi ngabe Mlungisi umtsandza ngempela yini. (Naleminye imibono lenembako yemukelekile.) (2)
- 11.11 Intfo loyitsandzako awuwaboni emaphutsa ayo. Mlungisi ngenca yekutsi abetsandza Lomusa, lonemaphutsa emphilweni yakhe, wakhetsa yena kunaSitsembile labemkhulelisile futsi angenamaphutsa njengaLomusa. (2)
- 11.12 Umbhali usebentise tento.
- Nkhangala: Umbhali umvete ngetento lapho abonakala angatingeni tindzaba tekutsandzana kwaboLomusa naMlungisi, ubonakala utihlalele emotini ngalesikhatsi boLomusa, Mlungisi naSitsembile bakhulumisana ngekulandvwa kwaMlungisi nguLomusa.
  - Lomusa: Umbhali umvete ngetento tekudzelela, njengekuya kaboMlungisi ayewumlandza embikwaSitsembile/ Kucabula Mlungisi embikwaSitsembile, nako kukhombisa yona indzelelo.
  - Sitsembile: Umbhali usebentise tento tekukhala, njengobe Sitsembile ahlala akhalela lite, njengalapho Mlungisi alandvwa khona nguLomusa/ Nangalesikhatsi anika Mlungisi kudla, wakhala. (Naleminye imibono lenembako yemukelekile.)

(3)  
[25]

**UMBUTO 12: UMBUTO LOYINDZABAMBHALO****SILULU SEMASWATI – NC Mthethwa**

Sakhiwo sendzabambhalo kumele sivete *singeniso, umtimba nesiphetfo*.

*'Labasembili baba semuva, labasemuva babe sembili,' kubhekiswa enganekwaneni, Umfati enyangeni nasetibongweni teNkhosi Tobias.*

**SINGENISO:**

Bahlolwa bachaza sihloko babuye basho nekutsi tento tebalingisi tiyakuveta kutsi, labasembili baba semuva, labasemuva babe sembili, njengenganekwane yemfati enyangeni nasetibongweni tenkhosi Tobias Nkosi.

**UMTIMBA:****Umfati enyangeni**

Tintfo letentiwa ngumfati acabanga kutsi uhlakaniphile, usembili, bantfu bendzawo labecabanga kutsi balibele abamboni, basemuva, kantsi utawubanjwa ajeziswe abe semuva kantsi abetibona asembili.

- Kwephula umtsetfo wesive netikhulu, wekungenti lutfo ngeLisontfo, acabanga kutsi akabowa, kantsi labanye bayambona. Wephula lemitsetfo ngekwenta loku lokulandzelako:
  - Kuvuka ngembulukusa anyenye ayokwenta imisebenti yakhe yasekhaya, kantsi labanye bantfu bendzawo bayambona – abecabanga kutsi usembili, bantfu labahlonipha lomtsetfo basemuva.
  - Kuya emasimini ayewuhlakula, acabange kutsi akabonwa, kantsi labanye bayambona, sebabikile nakulabaphetse sive - lokukhomba kutsi abecabanga kutsi uhlakaniphile, bantfu labahlonipha lomtsetfo basemuva yena usembili.
  - Kuyewutfota tinkhuni ngeLisontfo, kantsi lidlanzana lemadvodza endzawo limcuphile, lamvimba atsi sewubuyela ekhaya. Wabanjwa, waphoswa etulu, wapheshulwa sivunguvungu sayewumbeka enyangeni naloko labekutfwele nemntfwana emhlane, wagine abonwa sive imphilo yakhe yonkhe, wagine asasemuva bantfu labahlonipha lomtsetfo basembili.

**Tibongo tenkhosi Tobias Nkosi.**

Tintfo letentiwa sive sakaNkosi kuTobias, sicabanga kutsi sihlakaniphile, sisembili, ngobe sasebukhosini, kantsi ekugcineni Tobias utawubekwa abe yinkhosi yaso, agcine asembili, sive sesisemuva simkhotsamela. Loku kuvela ngaloku lokulandzelako:

- Kulahlwa ngalesikhatsi abelekwa, ngobe angafunwa, loko kukhomba kutsi abesemuva, bona basembili.
- Kukhuliswa ngunina yedvwa bakaNkosi bangenandzaba naye, kwakhomba kutsi abesemuva, bakaNkosi basembili.
- Kutsatfwa tindvuna tayewumlahla eFeni, timfulatsele njengesagila letingasitsandzi, lokukhomba kutsi abesemuva, bakaNkosi basembili.
- Kuhamba kwaTobias, aye ePitoli lapho bekuyewulwela khona live, kantsi sewutawubonwa ngulabadzala bakaNkosi bamtatatelele, - loko kukhomba kutsi besacala kuba sembili sive sisalela emuva.



- Kutsatsa kwaTobias bukhosi bakaNkosi, ahole lesive lesamlahla– loko kukhomba kutsi besasembili, laba labebasembili sebasemuva.
- Kubasita kanye nebantfwababo ngalesisikhatsi asayinkhosi – loko kukhomba kutsi besasembili, laba labebasembili sebasemuva.

(Naleminye imibono lenembako yemukelekile.)

### **SIPHETFO:**

Bahlolwa basonga konkhe labebacoca ngako lapha ngenhla, ngekuveta kutsi imibhalo yetemdzabu iyasifakazela nobe ayisifakazeli sitatsimende lesitsi, 'labasembili baba semuva, labasemuva babe sembili.'

**CAPHELA:** Bahlolwa kumele bacaphune tigameko letisenovelini letesekela imibono yabo.

### **BONA EMARUBHRIKI EKUMAKWA KWENDZABAMBHALO, SIGABA B ne–C**

**[25]**

### **UMBUTO 13: IMIBUTO LEMIFISHA**

#### **SILULU SEMASWATI – NC Mthethwa**

#### **HLUPHEKILE**

- 13.1 Insweleko kushona kwamake waHluphekile. Uyise waHluphekile wateka lomunye umfati. (2)
- 13.2 Lisu lekumchaza kutsi abelilanga liphuma, anemoya lopholile/Lisu lekumcamba libito kutsi nguHluphekile kantsi vele utawuhlupheka, njll. (Naleminye imibono lenembako yemukelekile.) (2)
- 13.3 Yinsumo. Inebalingisi lababantfu netilwane/Ayikaphatselani nemlandvo/ Ayifaki inkholo, njll. (Naleminye imibono lenembako yemukelekile.) (2)
- 13.4 Bunganekwane butfolakala lapho unina lomncane waHluphekile akhuluma nengwenya, nayo imphendvula ngobe ingwenya ayikhulumi, kepha lapha kulenganekwane iyakhuluma. (2)
- 13.5 Lesigameko sekuntjintjana kwetingubo sineligalelo lekubanjwa kwaGabisile endzaweni yaHluphekile. Kube abamange bantjintjane tingubo, ngabe ingwenya yabamba Hluphekile. (Naleminye imibono lenembako yemukelekile.) (2)
- 13.6 Siphetfo salenganekwane siyingwijikhwebu ngobe tetsamelilwati betilindze kutsi ingwenya itawudla Hluphekile kodvwa yagcina idle Gabisile. Inkinga yasombululeka ngoba uyise waHluphekile wagcina abubonile bubi lobentiwa ngulomfati wesibili kuHluphekile. (2)
- 13.7 Tetsamelilwati tifundza kutsi kufanele tati similo semuntfu letimtekako/ Nangabe utsi ugubhela lomunye umuntfu umgodzi, kuvamise kutsi kungene wena kuwo, ngobe make lomncane waHluphekile wavumelana nengwenya kutsi itawudla Hluphekile kantsi seyitawudla Gabisile umntfwanakhe. (Naleminye imibono lenembako yemukelekile.) (3)

**TIBONGO TENGWENYAMA BHUNU**

- 13.8 Yimvumelwanosigcino lecondzile ya-ni-/Yimvumelwanosigcino. (1)
- 13.9 Sihlangu sinembele wenkhomo. (1)
- 13.10 Yintsamo lendze leyondzile. (1)
- 13.11 Yimvumelwanosicalo lecondzile ya-Ngi-/Yimvumelwanosicalo. (1)
- 13.12 Mahlokohla abemnyama ngelibala/Umutsi lomnyama uyesabeka. Mahlokohla abesabeka, ngiko lokwenta afaniswe nawo. (2)
- 13.13 Lomugca usho kutsi iNgwenyama Bhunu beyingesuye umuntfu lotsandza bafati. Usetjentiswa nangabe kusonywana, intfombi ingalifuni lijaha. (Naleminye imibono lenembako yemukelekile.) (2)
- 13.14 Ligama lelitsi Bayethe! Lisetjentiswa nangabe kukhotsanyelwa umuntfu loyinkhosi. Lisetjentiswe kahle kuletibongo ngobe neNgwenyama Bhunu iyinkhosi lebeyihlonishwa kaNgwane, ngiko lokwenta kutsi akhotsanyelwe ngaBayethe! (2)

**[25]****SAMBA SESIGABA B: 25**

**SIGABA C: UMDLALO****UMBUTO 14: UMBUTO LOYINDZABAMBHALO****KUTAWUBA NJALO – SZ Simelane**

Sakhiwo sendzabambhalo kumele sivete *singeniso, umtimba nesiphetfo*.

**'Umuntfu loyishaya emuva ayishaye embili, usuke atibitela emashwa emphilweni yakhe,' kubhekiswa kuHleta.**

**Singeniso**

Bahlolwa bachaza sihloko babuye basho nekutsi nekutsi tento taHleta tikhomba kutsi, umuntfu loyishaya emuva ayishaye embili, usuke atibitela emashwa emphilweni yakhe.

**Umtimba**

Tigameko letikhomba kutsi Hleta abeyishaya emuva ayishaye embili.

- Buphiciphici baHleta ngekufa kwemkakhe.
    - Hleta wanta ngatsi utfukutsele, uva nebuhlungu ngekufa kwemkakhe, enta ngatsi abemtsandza kakhulu kantsi nguye lowatibulalela umkakhe. Loku kwamletsela emashwa ngobe wacina aboshiwe.
  - Hleta usebentisa Ncobile kubulala Gedlembane.
    - Hleta abetishaya lotsandza Ncobile ngekutsi amgcugcutele kutsi amikisele Gedlembane kudla ejele, kantsi uyati kutsi lokudla kunashevu, Ncobile abengakwati loko acabanga kutsi malume wakhe uyamtsandza kantsi abeyishaya emuva abuye ayishaye embili. Loku kwamletsela emashwa ngobe wetfweswa nelicala lekubulala Gedlembane.
  - Licebo laHleta lekuyewufunela Ncobile Mahlanganisa.
    - Hleta watfola lisu lekwala kuyewuvusela Ncobile esibhedlela, atsi uyewumfunela mahlanganisa kantsi abeyishaya emuva abuye ayishaye embili. Lobucili bamletsela emashwa wacina aboshiwe.
  - Hleta wacamba emanga kuMphotfo.
    - Hleta watishaya lotsandza Mphotfo ngekumecwayisa kutsi angasemukeli sisu saNcobile ngobe sesibikiwe sabuye savunywa futsi, kantsi abecamba emanga, bekuyindlela yakhe yekukhweshisa Mphotfo edvute kwaNcobile. Lokuyishaya embili abuye ayishaye emuva ngalamanga, kwamletsela emashwa, ngobe Ncobile naMphotfo bagcina bashadile, intfo labengafuni kuyibona yenteka.
  - Umshado waNcobile naMphotfo.
    - Hleta wabukeka ajabulile nakushada Mphotfo naNcobile kantsi abengabajabuleli ngekweliciniso, enyanya Mphotfo. Kuyishaya kwakhe embili abuye ayishaye emuva kwabonakala lapho enta ngatsi emaphoyisa uyawemukela kantsi uyati kutsi unemacala, kwamletsela emashwa ngobe wacina aboshiwe.
- (Naleminye imibono lenembako yemukelekile.)

**Siphetfo**

Bahlolwa basonga konkhe labebacoca ngako lapha ngenhla, ngekuphawula kutsi ngempela Hleta ngekuyishaya emuva, ayishaye embili, watibitela emashwa emphilweni yakhe wagcina aboshiwe.

**CAPHELA:** Bahlolwa kumele bacaphune tigateko letisemdlalweni letesekela imibono yabo.

**BONA EMARUBHRIKI EKUMAKWA KWENDZABAMBHALO, SICHIBIYELO B na C [25]**

**UMBUTO 15: IMIBUTO LEMIFISHA****KUTAWUBA NJALO – SZ Simelane**

- 15.1 Sikolo besesiphumile. Lomdlalo wenteka esikhatsini sanyalo lapho sekunetikolo khona/ **Babe abebhalise mine namake ebhange. Sikhatsi sanyalo lapho imali ibekwa emabhange/ Nansi imadlana singani sami safutsi utatitsengela lucingo. Sikhatsi sanyalo lapho sekunabomakhalekhikhini.** (2)
- 15.2 Lesitatimende siliciniso. Ncobile wanika Mphotfo imali lenyenti layishiyelwa nguyise ngalesikhatsi ashona ngoba abembhalile emafeni akhe. (2)
- 15.3 Wena awutitsandzi tintfo letiphambene nekulunga-Wasikhombisa ngekucale ale kutsatsa imali labeyinikwa nguNcobile/ **ngenkhumo yakhe yekwala kutsatsa imali/ Ucinisile Ncobile kutsi lemali longipha yona akusiyo yetinyembeti nengati lengenacala? - Wasikhombisa ngekutsi akazange ajabulele kunikwa imali langayati kutsi ichamukaphi.** (2)
- 15.4 Umbhali usetfulele ngekutsi Mphotfo abe nesingani lesinguNcobile njengabo bonkhe bantfu labadvuna labangenatihibe/Ngekutsi naye alwe, abange singani naCelani njengalabanye labangenatihibe, labalwela tindzaba telutsandvo/Ngekutsi Mphotfo afundze njengabo bonkhe labanye bantfwana labafundzako, labangenatihibe/ Kutfola umsebenti lotakumphilisa kahle njengabo bonkhe labanye labasebentako, labangenatihibe /Kushada abe nemndeni njengabo bonkhe labanye labashadile, labangenatihibe, njll. (Naleminye imibono lenembako yemukelekile.) (2)
- 15.5 Imibono itawehluka, ifake ekhatsi lena lelandzelako: Labavumako batawesekela ngekutsi, Labanye bomake abafuni lutfo ngebantfwana babo bemantfombatane, ngaloko LaHleta abenta kahle/ Labanye bebatawubita Celani naNcobile njengobe LaHleta abengamfuni Mphotfo/Labanye bomake bebatawenta ngatsi abababoni kutsi bentani/ **Labanye bomake bebatabagijimisa bashaye Mphotfo nobe Ncobile njengobe vele angafuni kutsi avane naye.** Labaphikisako batawesekela ngemaphuzu abo, ngekwemibono. (2)

- 15.6 Imibono itawehluka ifake ekhatsi loku lokulandzelako: Abentela kutsi behlukane bayekele kulwa/Abentela kutsi LaHleta atewubona imikhuba lemibi yaNcobile/Abentela kutsi LaHleta abone kutsi Ncobile uyachubeka naMphotfo/ **Abefuna kukhalima simo lebesesicale kushuba/kulamula** njll. (Naleminye imibono lenembako yemukelekile.) (2)
- 15.7 Tifundza kubekela bantfwana imali nabasaphila kute bayisebentise nasebathonile/ Tifundza konga imali/Inhlonipho lefanele yentiwe nguNcobile kunina/ Tifundza kutsi umntfwana awumkhetseli luhlobo lwemuntfu lafanele atsandzane nalo/ Akusibo bonkhe bantfu labajabulela kukubona ujabulile-bantfu abayi nganhlaye bangesiwo emanti, njll. (Naleminye imibono lenembako yemukelekile.) (2)
- 15.8 Sibumbene ngekutsi LaHleta yena abefuna kutsi Ncobile atsandzane naCelani endzaweni yaMphotfo/ LaHleta wabuta Ncobile kutsi yini atsandzane naMphotfo endzaweni yaCelani/ Bobabili bebabumbene ngekungatsandzi Mphotfo/ Bobabili bebahlangene ngekutsandza imali. (2)
- 15.9 Kulwa/ Kubulalana/ Kuboshwa/ Kutfunjwa, njll. (Naleminye imibono lenembako yemukelekile.) (2)
- 15.10 Tingani atibi safuna kusuka kuyo ngobe tifuna lemali/Tingayidla yonkhe, itsi ingaphela tinyamalale/Tingagecekeza kabolentfombi/Tingaphocelela intfombi kutsi itinike lemali/ **Lentfombi ingagcina itilobola/ Lentfombi ingagcina seyondla bakabolesingani sayo**, njll. (Naleminye imibono lenembako yemukelekile.) (2)
- 15.11 Kona lokunyenti kubangwa yimali. Celani wasongela Ncobile ngobe anemali, lobesekukhomba kutsinaye abesafuna kuba yincenye yekudla lemali/ Celani ulwa kwehlukhanisa Ncobile naMphotfo kute lemali itfolwe nguyeye esikhundleni saMphotfo, njll. (Naleminye imibono lenembako yemukelekile.) (2)
- 15.12 Ncobile wagana Mphotfo abe ambona kutsi ukhubatekile, kodvwa wamtsandza anjalo wangambandlululi/Unina wamcindzetela kutsi amale, kepha Ncobile wamvela kutsi namlahla utawuganwa ngubani akulesimo lakuso/Mphotfo abephuyile kodvwa Ncobile wamtsandza anjalo/Mphotfo abehlala endlini lelivokololwana, kepha Ncobile wamtsandza anjalo, njll. (Naleminye imibono lenembako yemukelekile.) (3)

**[25]****SAMBA SESIGABA B: 25**

**UMBUTO 16: UMBUTO LOYINDZABAMBHALO****LAMI LISIPHETFO – JJ Thwala**

Sakhiwo sendzabambhalo kumele sivete *singeniso, umtimba nesiphetfo*.

*'Umuntfu loyishaya emuva ayishaye embili, usuke atibitela emashwa emphilweni yakhe,' kubhekiswa kuMahubhulu.*

**Singeniso**

Bahlolwa bachaza sihloko babuye basho nekutsi tento taMahubhulu tikhomba kutsi, umuntfu loyishaya emuva ayishaye embili, usuke atibitela emashwa emphilweni yakhe.

**Umtimba**

Tigameko letikhomba kutsi Mahubhulu abeyishaya emuva ayishaye embili.

- Bucili lobentiwa nguMahubhulu enkhosini Somhlolo.
  - Mahubhulu abenta sengatsi uvumelana nenchubo yekubusa live ngobe uma inkhosi imbuta kutsi sive siyenetiseka yini ngendlela lebusa ngayo, avumelane nayo kantsi nakhuluma nebantfu abetsi Somhlolo akalibusi kahle live.
- Kutfunywa kwaMahubhulu kuMabhoko.
  - Mahubhulu watenta lotfumekekako ngalesikhatsi Somhlolo amtfuma kuMabhoko kutsi ayewumcelela buhlobo lobuhle, yena wefika kuMabhoko wakhuluma emanga, atsi utewumluma indlebe ngobe Somhlolo abehlela kutewumhlasela. Ngaloko watibitela emashwa ngobe wagcina atibulele.
- Kuhola libutfo leMahubhulu.
  - Mahubhulu abekhutsalele kuvivinya libutfo laliholako kutsi likhone kuhlasela nekuvikela live nalihlaselwa titsa, kantsi ulivivisela kuketula Somhlolo. Ngaloko abetibitela emashwa ekutibulala.
- Kutiveta kutsi umephi nabutwa nguSomhlolo.
  - Mahubhulu wenta sengatsi wahamba kahle kuMabhoko ngalesikhatsi abutwa yinkhosi. Watjela Somhlolo kutsi ukwentile loku labeyele kona, waphindze watsi uphumelele kukwenta loko, kantsi abecamba emanga. Ngaloko watibitela emashwa ngobe kwagcina kufa yena ngekutigwaza ngesikhali sakhe.
- Mahubhulu utitsandzisa inkhosi.
  - Mahubhulu wenta ngatsi ufisela inkhosi kutsi ihambe kahle kaBhocwane, kantsi abati kutsi ayinawutfo muntfu.

((Naleminye imibono lenembako yemukelekile.))

**Siphetfo**

Bahlolwa basonga konkhe labebacoca ngako lapha ngenhla, ngekuphawula kutsi ngempela Mahubhulu ngekuyishaya emuva ayishaye embili, watibitela emashwa emphilweni yakhe ngobe wagcina atibulele.

**CAPHELA:** Bahlolwa kumele bacaphune tigameko letisemdlalweni letesekela imibono yabo.

**BONA EMARUBHRIKI EKUMAKWA KWENDZABAMBHALO, SIGABA B ne–C.**

**[25]**

**UMBUTO 17: IMIBUTO LEMIFISHA****LAMI LISIPHETFO – JJ Thwala**

- 17.1 Uya eNgwenyameni ungati lutfo, kodvwa ufike utfole lwati lolwanele/Uya ucakekile kodvwa ufike usitakale/Ulusito lolukhulu Bhuza. (2)
- 17.2 Abengeke ehluleke ngobe emabutfo abenawo labengahlasela ngawo, futsi abehlala avivile. (2)
- 17.3 Kuba nemabutfo laviviswa njalo kodvwa angahlaseli/Kuba nelubandlululo etindvuneni takhe/Kuba nemusa emakhosini lakhelene nawo, njll. (Naleminye imibono lenembako yemukelekile.) (2)
- 17.4 Kute labekwenta yedvwana, Abebonisana netindvuna takhe kanye nenina/ Abekhulumisana nemakhosi labomakhelwane kutsi bamendzisele tintfombi, njll. (Naleminye imibono lenembako yemukelekile.) (2)
- 17.5 Ngekuhlalisana ngelucolo nabomakhelwane bakhe/Ngekulalela unina kutsi ente loko lamtjela kona/Ngekuteka etiveni letibomakhelwane kute agweme kucitseka kwengati, njll. (Naleminye imibono lenembako yemukelekile.) (2)
- 17.6 Sigogodvolo uyagucugucuka ngobe nakhuluma naMahubhulu uhambisana naye, kantsi nakhuluma naSomhlolo, uphindze ahambisane naye. (2)
- 17.7 Abebona kutsi ngeke akwati kuncoba Somhlolo/Abecabanga kutsi vele Somhlolo abetambulala/Kungahambisani kwakhe nenkhosi kanye netindvuna, njll. (Naleminye imibono lenembako yemukelekile.) (2)
- 17.8 Lamavi abefanele yena Mahubhulu, abecabanga kutsi inkhosi ngiyo lesengotini kantsi lamavi afanele yena ngobe watigwaza ngesakhe sijula. (Naleminye imibono lenembako yemukelekile.) (2)
- 17.9 Imibono itaweHLuka ifake ekhatsi loku lokulandzelako:  
EMaswati abetawuphatfwa nguMahubhulu nemikhuba yakhe yeludlame/ Abetawuhlasela tonkhe tive lakhelene nato/Linani lebantfu beMaswati belitawuncipha ngobe labanyenti bebatawube bafele emphini/Bekutawuba neludlame emkhatsini wetindvula ngobe tindvuna letinyenti betingamtsandzi Mahubhulu/Mhlawumbe naye Mahubhulu abetawufa etimphini tembango, njll. (Naleminye imibono lenembako yemukelekile.) (2)
- 17.10 Abefuna kutsi umdlalo uchubekele embili ngobe nguye Mahubhulu labebangisa inkhosi kubusa live/Ingcikitsi beyingeke igcame/Njengembangi, umdlalo bewutawusheshe uphele, njll. (Naleminye imibono lenembako yemukelekile.) (2)
- 17.11 Emakhosi labendvulela Somhlolo Abelwa timphi yena abebusa ngelucolo/ Somhlolo abebonisana netindvuna takhe nangabe enta lokutsite kantsi lawa lamanye emakhosi abebovilawo/Somhlolo abeteka bafati etiveni lakhelene nato kantsi lawa lamanye emakhosi abengateki bantfu betive, njll. (Naleminye imibono lenembako yemukelekile.) (2)
- 17.12 Lesaga sisho kutsi tintfo letitsandvwa bantfu tehluKile, abasekeli tintfo letifanako. Siyahambelana nembuso waSomhlolo ngobe nakuwo bebakhona labebahambisana naye njengaboNsibandze, Sikhunyana naletinye tindvuna tenkhosi kantsi labanye bebangahambisani naye, njengaMahubhulu naboSigogodvolo. (Naleminye imibono lenembako yemukelekile.) (3)

**[25]**

**SAMBA SESIGABA C: 25**  
**SAMBA SAKO KONKHE: 80**

**SIGABA A: IRUBHRIKI YEKUHLOLA INDZATJANAMBHALO YENKONDLO [10 EMAMAKI]**

<b>Timphawu</b>	<b>Emalengiso</b>	<b>Licophelo lelisetulu</b>	<b>Lokwenetisako</b>	<b>Lokusilele</b>	<b>Lokungaphumelelisi</b>
<b>LOKUCUKETFWE</b>	<b>5-6</b>	<b>4</b>	<b>3</b>	<b>2</b>	<b>0-1</b>
Kuchazwa kwesihloko Kujula kwemibono, Kwesekela nekuvisiswa kwetheksthi  <b>6 EMAMAKI</b>	-Sihloko sichazwe ngalokujulile -Luchungechunge lwemaphuzu lababatekako ekwesekela lacashunwe enkondlweni -Luhlobo lwembhalo kanye nenkondlo kuvisiswa ngemalengiso	-Sihloko sichazwe ngelicophelo lelisetulu kukhomba kusivisisa -Emaphuzu ekwesekela ayevakala kodwa akaketfulwa ngendlela lelindzelekile -Luhlobo lwembhalo kanye nenkondlo kuvisiswa ngelicophelo lelisetulu	-Sihloko sichazwe ngalokwenetisako -Akhona lamanye emaphuzu lamahle lesekela sihloko ngalokwenetisako -Leminye imibono yesekelwe kodwa esikhatsini lesinyenti bufakazi abukholweki -Luhlobo lwembhalo kanye nenkondlo kuvisiswa ngalokwenetisako	-Kuchazwa kwesihloko akwenetisi -Kulukhuni kutfolo emaphuzu lesekelo sihloko -Luhlobo lwembhalo kanye nenkondlo akukavisiswa kahle	-Sihloko asikavisiswa nakancane -Akukho kucaphuna enkondlweni -Luhlobo lwembhalo kanye nenkondlo akukavisiswa nakancane
<b>SAKHIWO NELULWIMI</b>	<b>4</b>	<b>3</b>	<b>2</b>	<b>1</b>	<b>0-1</b>
Sakhiwo, Kuhleleka nekwetfula Kusetjentiswa kwelulwimi, umoya, nesitayela  <b>4 EMAMAKI</b>	-Sakhiwo lesibumbene ngemalengiso -Imibono yakhiwe yahleleka ngalokucace ngemalengiso -Lulwimi, umoya nesitayela kuvutsiwe futsi akunamaphutsa -Emaphutsa eluhlelo, sipelingi netimphawu tekufundza kuyindlala	-Sakhiwo lesicacile lesinemibono lehleleke ngelicophelo lelisetulu -Imibono letfuliwe iyalandzeleka -Kunemaphutsa lambalwa elulwimi, umoya nesitayela	-Bukhona bufakazi lobutsite besakhiwo -Kubumbana nekuhleleka kwemibono kuyenetisa -Lulwimi lunemaphutsa langasho lufu; umoya nesitayela kuyenetisa	-Sakhiwo sikhomba emaphutsa ekuhlela -Imibono ayikahleleki ngalokubumbene -Lulwimi lunemaphutsa lamanyenti -Umoya nesitayela akukemukeliki	-Sakhiwo lesingemukeliki nakancane -Imibono ihlangahlangene -Lulwimi lolunemaphutsa lamanyenti nesitayela lesingemukeliki -Umoya nesitayela akwemukeliki nakancane

**CAPHELA: Nangabe umhlolwa angakabhali ngalokufunwa ngumbuto, abe abhale lokunhlanhlatsako, akanganikwa emamaki ako kokubili, Lokucuketfwe, Sakhiwo neLulwimi.**





**SIGABA B NE–C: IRUBHRIKI YEKUHLOLA INDZABAMBHALO – YENOVELI NEMDLALO [25 EMAMAKI]**

<b>Timpawu</b>	<b>Emalengiso</b>	<b>Licophelo lelisetulu</b>	<b>Lokwenetisako</b>	<b>Lokusilele</b>	<b>Lokungaphumelelisi</b>
<b>LOKUCUKETFWE</b>	<b>12–15</b>	<b>9–11</b>	<b>6–8</b>	<b>4–5</b>	<b>0–3</b>
Kuchazwa kwesihloko Kujula kwemibono, Kwesekelwa nekuvisiswa kwetheksthi  <b>15 EMAMAKI</b>	-Imphendvulo leneminingwane lengemalengiso lababatekako: 14–15 Imphendvulo leneminingwane lengemalengiso langababateki: 12–13 -Sihloko sichazwe ngalokujulile -Luchungechunge lwemaphuzu lababatekako ekwesekela lacashunwe etheksthini -Luhlobo lwembhalo kanye netheksthi kuvisiswe ngemalengiso	-Imphendvulo leneminingwane lesecophelweni lelisetulu -Sihloko sichazwe ngelicophelo lelisetulu kukhomba kuvisisisa -Lamanye emaphuzu ekwesekela ayevakala kodvwa akaketfulwa ngendlela lelindzelekile -Luhlobo lwembhalo kanye netheksthi kuvisiswa ngelicophelo lelisetulu	-Sihloko sichazwe ngalokwenetisako kodvwa akusito tonkhe tinhlangotsi leticikelelwe ngalokuphelele -Akhona lamanye emaphuzu lamahle lesesekela sihloko ngalokwenetisako -Lamanye emaphuzu esekelwe kodvwa esikhatsini lesinyenti bufakazi abukholweki -Kukhona lokusilele ekuvisiseni luhlobo lwembhalo kanye netheksthi	-Sihloko sichazwe ngekunyanyalata ngaphandle kweminingwane lesekelako -Ambalwa kakhulu emaphuzu lafanele kwesekela sihloko -Kuncane kakhulu kuvisiswa kweluhlobo lwembhalo netheksthi	-Kuncane kakhulu kuvisiswa kwesihloko -Mncane kakhulu umzamo wekuphendvula umbuto -Imibono ayikholweki -Luhlobo lwembhalo kanye netheksthi akukavisiswa nakancane
<b>SAKHIWO NELULWIMI</b>	<b>8–10</b>	<b>6–7</b>	<b>4–5</b>	<b>2–3</b>	<b>0–1</b>
Sakhiwo, Kuhleleka nekwetfula Kusetjentiswa kwelulwimi, umoya, nesitayela  <b>10 EMAMAKI</b>	-Sakhiwo lesibumbene -Singeniso nesiphetho lesingemalengiso -Imibono yakhiwe yahleleka ngemalengiso -Lulwimi, umoya nesitayela kuvutsiwe futsi akunamaphutsa	-Sakhiwo lesicacile lesinemibono lehleleke ngelicophelo lelisetulu -Singeniso nesiphetho kanye naletinye tindzima kuhleleke ngalokubumbene -Imibono ihleleke ngelicophelo lelisetulu -Kunemaphutsa lambalwa elulwimi, umoya nesitayela	-Bukhona bufakazi lobutsite besakhiwo -Kuhleleka nekubumbana -Kuhleleka nekubumbana kwemubono kuyenetisa kodvwa kunemaphutsa -Lulwimi lunemaphutsa lambalwa; umoya nesitayela kuyenetisa Kuhleleka kwetindzima kuyenetisa	-Sakhiwo sikhomba emaphutsa ekuhleleka -Imibono ayikahleleki ngalokubumbene -Lulwimi lunemaphutsa lamanyenti -Umoya nesitayela akwemukeleki Kuhleleka kwetindzima kunemaphutsa	-Kungahleleki kahle kwesakhiwo kukhinyabeta kubumbana kwemibono -Emaphutsa elulwimi nesitayela lesingakemukeleki kwenta lombhalo ungabi yimphumelelo -Umoya nesitayela akwemukeleki -Tindzima tihlangahlangene
<b>KWEHLUKA KWEMAMAKI</b>	<b>20–25</b>	<b>15–19</b>	<b>10–14</b>	<b>5–9</b>	<b>0–4</b>

- Kufanele kungabi nemehluko wemazinga lamabili emkhatsini welimaki leSakhiwo neLulwimi nelimaki laLokucuketfwe.
- Imphendvulo lengaphendvuli umbuto ayinganikwa emamaki aLokucuketfwe neweLulwimi neSakhiwo.

# TIMPHAWU LETISETJENTISWA NAKUMAKWA LULWIMI

## 2018

<b>1.</b>	<b>Sipelingi</b>	<b>sp</b>
<b>2.</b>	<b>Timphawu tekufundza</b>	<b>p</b>
<b>3.</b>	<b>Kuphindzaphindza</b>	<b>pp</b>
<b>4.</b>	<b>Lulwimi</b>	<b>lw</b>
<b>5.</b>	<b>Luhlelomusho</b>	<b>lm</b>
<b>6.</b>	<b>Kuhlanganisa</b>	
<b>7.</b>	<b>Kwehlukana</b>	<b>/</b>
<b>8.</b>	<b>Lokushiye</b>	<b>^</b>
<b>9.</b>	<b>Sikhatsi</b>	<b>skh</b>
<b>10.</b>	<b>Kuhlanganisa imicondvo yenzima</b>	
<b>11.</b>	<b>Kwehlukana tindzima</b>	